

Annaschta ...

Von Norbert Breuer-Pyroth

En Saalouis wor frieher manches annerschd. Unn wenn ät ganz annerschd wor, dann wor ät sogar *annaschta*.

Jeder hott Jeden kannt. Unn weil noch käner en Handy hott, és ma einfach zu de Leit klingeln gang. Daach unn Naat konnschte kómmen, käh Problem. Ma muß sich nur de Quanten abbótzen, wenn de Tant Friedel mém Bótzlompfen am Wulpern wor. Dôfür hat ma *maaien gehen* gesaat. Wenn ma kómm es, hann de Leit zuerscht ät Fernseh ausgemach. Heit lossen s'ät aan.

Unn wenn se grad Bohnesauf odder Éngédämpten om Désch hodden, haschte zwei Teller métgess. Annamôhl es da Bohnematz komm, der Kuldurflappes, unn hat gleich zwei Póppen unn drei Hasen vakasemaduckelt. Dann hadda gesaat: awei geh ich awwa moll hemm zenaatessen.

Off da Strôß hat ma noch de Hut vorenanna gezoh, ei mä jôô. Dat macht heit käner meh. Awwa wenn de Gléck hascht, hollen se de Stöpsel aus'm Ohr.

Unn dann muß man sich jô nedd so dappa dómmeln wie heit. De Saalouiser Eckeschtea hodden émma Zeit. Villzevill, se hadden gäa meh geschafft. Awwa se woren ach vill mied.

En all dem Gedöhns unn Schlammbampes nôm Kriech hôdden de Kénna – de Stadt wor voll davon - awwa all ihr Geheischnis. Hann émma vill Jacht gemach, woren iwwerall vaschammariert. Se hann tuschur watt geliwert, exgepress, die Fräckerten. Dodafier hann se manchmoll äne von dene kriecht, die nix koschden. Do kãm heit de BILD-Zeidung. Brauch se awwa nedd, weil: Saalouis hat jô kaum meh Kénna.

Annerschd wor ach da Lyoner in déenne Scheiwen. Der hieß dômols noch Elefantenwourscht, de Salami noch Grôwourscht. Met *den* Namen hann se mia besser geschmeckt wie heit. Off de Plakaten von da *Donner-Brauerei* stand „Saarlouiser Neger trinken Donner“. Datt kannschte heit nemme schreiwen, sonscht hallen se Mahnwachen. Unn wenn de ausgesinn hascht wie än Harzkrämer, haschde noch lang kãn *Hartz IV* kriecht.

De Welt wor nedd so greilich wie heit, wo ma jo leider alles wääß, watt woannerschd pasiert.

Dann - off äääämôhl - wor alles fott: de Ziewäncha vaschwunn, die klãn Geschäftchja aach. Ich sinn se noch all voraama.

Datt ich jetz scho Schluß mach, es aach annerschd. Frieher hat ma nämlich noch vill meh vazählt. Saa, ich hätt datt gesaat!

Alle Rechte vorbehalten. Kein Teil des Werkes darf in irgendeiner Form (Druck, Fotokopie, Mikrofilm oder ein anderes Verfahren) ohne schriftliche Genehmigung des Autors oder der von ihm zitierten Rechteinhaber reproduziert oder unter Verwendung elektronischer Systeme verarbeitet, vervielfältigt oder verbreitet werden.
All rights reserved. This material may not be published, broadcasted, rewritten or redistributed.
Tous droits réservés, textes et illustrations.